

Das zwölffte Capitel.

Wie man Tauben/ Turteltauben/ vnd andere groß
vnd kleine Vögel mehr / mit Netzen fa-
hen soll.



Wenn du mancherley Geschlecht der Vögel / vnd nemlich Tauben/
Turteltauben / vnd mittelmässige Vögel fahen wilt / so soltu haben zwey lange
Netze/ genant die Wände/ vnd dieselbigen auff Wiesen oder Aecker/ mit weit von
Wassern/ so weit von einander/ als sie bey nahe breit seyn / außbreiten vnd auß-
spannen. Ein jedes vnter ihnen soll zweyen Stäb / die es heben vnd auffwiegen/
wenn der Zugstrick am Netze gezogen wirt/ haben. Die Zugstricke sollen so lang
seyn/ als die Netze breit seyn/ vñ sol ein jeder mit einem Hauptzincken/ mit einem kleinen Stäcken in
die Erden gefestet vnd geheffet werden. An dem andern Hauptzincken/ sollen sie einen gemeinen
Strick haben/ derselbige sol an einem gemeinen Stecken / in die Erden gesteckt/ gefestet seyn/ vnd
von dem andern Haupt/ sollen sie einen andern Strick haben/ der soll bis an des Voglers Häußlin
bedeckt gehen. Zu grossen Vögeln müssen sie ziemlich stark/ vñ nicht eng/ zu den kleinen aber
müssen sie eng seyn. Solche Netze/ wenn sie auff der Erden ligen/ seyn sie von einander getheilt vnd
gesöndert/ Wenn sie aber mit dem Strick gezogen werde/ werden sie also zusamen geschlossen vnd
gefügt/ daß sie darunder einen jeglichen Vogel/ so begriffen wirt/ bedecken. Es sollen vnter diesen
Netzen zur Speise angebunden seyn/ blinde Tauben / oder Turteltauben/ vñ inen die obern Aug-
brauen oder Lieder/ damit sie nicht sehen mögen/ mit einem Faden zusamen geheffet seyn. Oder
wenn du wilt/ so magstu auch Vogelhäut/ welche noch ganze Köpff haben/ mit Halm oder Stroh
aufffüllen/ vnd sie/ als ob sie noch lebendig weren/ vnd auff iren Füßten stünden/ sein auffrichtig vnd
steiff auff Rütlin vnd Stäcklin setzen. Zu den kleinen Vögeln ist auch ein Raub gut/ denn sie gar
gern zu im kornen. Du magst auch dahin etliche kleine Vögel mit Fäden anbinden/ dieselbige alle
da umbher fladern/ vnd die andern kleinen Vögel also auch herbey locken lassen. Wenn die Sper-
ber/ Habich vnd Falcken solche kleine Vögel erschen / lassen sie sich auff sie nider / vñ rauben sie.
Wenn solches sich zutrüge / daß diese grosse Raubvögel / auff die kleinen / sie zu rauben/ absteigen
wolten / so soll der Vogler sie nicht nidersitzen lassen / sondern im flug sie geschwind
ergreifen / bedecken / vnd ins Netze gefangen eyn-
schliessen.

Das